

嘉慶直隸太倉州志

直隸太倉州志卷二十九

人物

忠節

太倉州

元

顧顗字孟禹元海市舶司正少孝友及繼父職捐家貲招徠俠士王子才贊成海運自劉家河至南薰關築長堤三十餘里名樓列布番賈如歸武陵橋由此得名至正二十四年遭方國珍亂臨難不屈伏劍死

杭和卿杭州人元開海運徙太倉充漕戶方國珍入寇和卿散財殺求死士僧懺首應募奮力格賊旬日殺賊

數百梟首半涇上賊少沮民得聞竄旣冒雨大戰懾首  
失足死和卿一家無少長遇害

明

龔詡字大章號鈍菴父給事中啓以直諫戍五開戍時  
詡方三歲隨母王依外家啓歿勾補伍族人保持之行  
金得緩年十四補遼陽衛建文閔詡直諫子調守金川  
門年二十一靖難兵至谷王穗以門降守者奔詡奮戈  
不中走郊外龔一當顧宮中火起乃大慟變姓名爲王  
大章遯歸里時大索亡至任陽馬陳二氏匿詡大困中  
詡卽困中讀書間夜渡婁江省母索益急族人瑀復隱  
爲計歷二十餘年稍賣藥授徒人盡知王大章卽龔啓

子詡也傷其志無告者宣德七年周忱籍田江南聞之具禮訪詡詡條便宜二十事民以爲便母卒詡已班白號輒絕久之忱薦署松江太倉鎮海衛學教授不應忱躬請之泣然曰詡老兵仕無害但負往日城門一慟耳忱歎息去無子築逸老庵虞浦上獨與一老婢居破廬中有田三十畝種荳植蔴歌詠自得每及先朝事悲不勝年八十有八卒卒時整衣冠端坐誦大學而絕有白氣起屋上門人謚曰安節先生隆慶間卹錄壬午諸臣撫臣張佳允疏請得特祠按勝朝殉節諸臣錄入祠土民有金川門卒龔翊籍貫未詳燕兵入金川門慟哭遂隱而死蓋卽詡也

顧同寅字文通璜溪人初名泰萬歷四十七年武進士

第二人任懷柔守備天啟六年坐與同里孫文豸作詩

悼熊廷弼爲兵馬司捕獲皆棄市御史門克新又指爲

妖言波及修撰文震孟與編修陳仁錫庶吉士鄭鄮並

斥爲民崇禎初賜祭二壇文豸生員無可攷

按張朱州志禪說顧

同寅孫文豸皆黜生同寅本名其泰以罪竄致父斃獄

變名至京中武舉第二文豸亦以稔罪逃往依同寅天

啟七年春璫橫兩人謀織江南善類圖進身已有隙以

他事互訐並誅同時柳幾者五人云今考顧氏家譜所

載同寅爲感激義憤之士如禪說言則作奸犯科本非

善類第御批綱目三編及通鑑綱目輯覽既取其

事而明史載人文震孟傳尤詳且與東林諸君子善尤

無可疑者張志禪說恐當時私惡流傳不加詳審而遽

附于志歟但據陳仁錫傳里人孫文豸以誦步天歌見

捕坐妖言鍛鍊成獄詞連仁錫則文豸又非與同寅同

得罪者其謂仁錫同里者時太倉蘇州屬邑故云又諸

稱武進士第二禪說稱武舉第二亦互異應再考之

趙自新字我完四歲失足墮井家人引縋出之無怖色

年十一從父觀射飛矢中股醫者治之出鏃色不變喪  
母家貧身執廝養役而勤學弗輟崇禎十二年舉於鄉  
父老思就祿養十六年需次京邸忽心痛遂歸父病果  
劇乙酉詣州守請給僧牒微服出行祝髮於松江之會  
龍菴旋隱嘉定之封家村如臯冒襄聞名請教其子旣  
而有謝姓者告以應舟山之招自新謝之及事洩逮者  
至門自新與弟方奕徐欵子就縛曰吾久辦此矣械至  
松江絕食數日不死復械至江寧時主讞者爲洪承疇  
自新昂身前對曰身爲故國遺民豈嘗須臾忘死哉顧  
有其志無其事徒負虛名竊用爲愧復鞠謝姓者卒無  
實得釋歸旬日卒年五十三臨沒謂其子曰吾生無益

於世沒後題墓石曰明鄉進士憤道僧趙某願足矣自新面目嚴冷人望而畏之著作甚多陳瑚陸世儀輩皆其弟子

沈雲祚字子凌弱冠隨其父謁高攀龍於東林得主敬之學崇禎十三年成進士授華陽知縣獄囚秦纘勲者爲穽黃賊耳目殺獄卒逸雲祚潛告其族人石砭土司秦良玉俄械之至吏驚爲神十七年正月張獻忠破夔州成都大震雲祚見蜀王陳守禦策不納聞內江王至涿賢以言激之至涿心動告王王終以祖制辭五月賊陷重慶燒劫數百里旋薄城下雲祚偕僚屬忼慷誓死守巡撫龍文光急遣郫縣令趙嘉煒決郫江大堰注錦

江以益濠水甫至城已破賊執雲祚幽大慈寺饋以食  
雲祚躍起大罵指其口曰我有口食賊肉耳豈食賊粟  
哉遂遇害 國朝賜諡忠烈幼子苟蔚字豹文方五歲  
友人預匿之山中得脫入籍眉州以拔貢任崇慶州學  
正越二十年始歸作蜀難叙畧上之史館

徐樹聲字文岳萬歷四十四年遼事告急樹聲以布衣  
謁將軍李如松留幕五年如松死孫承宗駐廣寧樹聲  
復詣軍門獻策承宗悅之使隸監軍袁崇煥天啟七年  
寧遠之戰遣樹聲奏捷京師賜銀杯等物使歸壽其父  
崇煥進遼撫授樹聲遊擊及崇煥誅孫元化爲巡撫擢  
旅順島叅將元化遣孔有德等援遼道新城作亂據登



州樹聲聞報馳救半渡颶風大作軍艘覆溺者半轉募赴敵戰于登州之西關力屈被執不食死

王燾字濬仲秩元孫少孤貧九歲出嗣從叔族人  
有謀其產者產且鉅萬燾悉以讓獨迎養嗣祖母及母惟謹  
萬歷四十六年舉於鄉授海門教諭謝革贊儀丁生母  
憂補儀真邑令墨絕弗與通嘗會試路資絕商人汪慕  
燾清節進百金婉詞弗受荐陞解州知州未任丁祖母  
憂服除補選或勸營善地弗應得隨州州經羣盜焚掠  
戶不滿千燾至增城垣練軍實土寇李良喬爲亂殲滅  
之賊騎過隨督土兵擊斬三百餘人賊憤以衆爲城拒  
守二十日引去崇禎十年正月賊大至守將王大用遁

開廂失守燾猶晝夜乘城手殺賊偵會天大風雪西城  
火裂燾知事敗馳入署整冠帶自縊賊焚州治所縊室  
獨存屍植立不仆賊望見駭走旣所司察狀覓州印印  
出燾所立尺土下踰年子錫中疏請贈卹福王時謚烈  
愍建雙忠祠與同邑蔡懋德並祀 國朝謚節愍

黃翼聖字子羽父元勲萬歷四十七年進士歷任陝西  
兵備有惠政翼聖少雋異眉目如刻畫舉止警欬秀絕  
人表爲編修王衡婿崇禎十一年以薦授四川新都縣  
令時賊躡楚蜀名城望風奔潰新都素殘破聞賊至爭  
走匿翼聖積薪拒縣門誓死守城得全陞安吉知州尋  
棄官歸隱名所居曰蓮蕊栖翼聖性蕭閒絕喜山水工

五言詩人稱如公絃哀玉自有天韻郡人徐波刻其遺集

吳繼善字志衍崇禎十年進士爲人博學辨智書一覽輒記文體古麗取法漢魏名稍亞于張溥謁選得四川成都知縣時寇陷荆襄或尼其行繼善不可遂間道之官見蜀事棘啟請蜀藩發帑金備寇不應張獻忠破成都一門四十餘口俱遇害時甲申十一月二十五日也其弟事衍幸脫歸始知其詳僕五郎者已免奮然曰主死吾安得獨生慷慨罵賊亦死之按吳偉業傳云張獻忠破成都被執罵不絕口賊齎而割之一門四十餘口皆遇害彭遵泗蜀碧所載亦同但四庫全書館總裁等議覆左都御史張若淮條奏內稱繼善降賊被殺未知本於何書故並紀于此又按錢塘林路歲寒堂存稿延陵入子詩跋云入

子者吳偕盛無咎吳孫祥綿祖吳沅湘九吳天榆歷所  
吳璟元朗吳璘中魏吳翊振西吳主德振緒雲間老友  
沈文聖携其詩示曹侍郎秋岳侍郎叙其首簡而更屬  
余跋之又云元朗中麗是梅村令子張西銘既歿而甥  
孫振西振緒與其父綿祖能得西銘之傳綿祖志衍子  
也攷志衍全家遇害惟弟事衍逃歸未嘗有孫祥之文  
意孫祥卽事衍之子爲志衍後而振西振緒乃其所生  
未可知也綿祖元朗中麗振緒四人外餘必皆係州人  
而文獻缺如殊不可攷友聖名麟青浦白  
鶴江人梅村有送其

詩者是也

王祈魯王時爲建寧守將封郎國公建寧破巷戰不勝  
遂自焚死 國朝追謚烈愍

王淳字美升弟湛字德嚴俱諸生 大兵定蘇州留將  
張天福孟全勝以重兵駐太倉鄉兵起淳湛部署其衆  
率雙鳳鎮千人至北門 大兵出擊之兄弟皆死後入  
祀忠義祠

季曾貫字恕先州庠生吳繼善延赴成都幕獻賊陷成都繼善闔門遇害賊解曾貫縛令作郊天文不屈賊燔之骸骨爲灰燼

蘇應昌字際之衛百戶中武舉授潁州守備拒却流賊告假歸居南城大兵至走別墅密室中自經兩子解之會鄉兵攻城應昌欲內應張帥獲之面鞠不屈曰殺則殺耳持不受叛逆名遂受刃長子願代死張義而釋之

張陽豫字孟和州貢生選授金壇訓導後遷居崑山大兵圍城陽豫登陴拒守與其子執黃旗麾軍城破死之

郎星緯字元羽諸生少穎異美丰儀爲文工儷體試輒  
冠軍素以忠義自矢甲申燕都失守星緯憤朝士多從  
賊艸檄致討文出四方競傳之順治二年夏大兵至  
閉戶慟哭會新令下弗從走沙溪卒就死年三十餘  
尙子升州人就婚崑山沈氏家馬鞍山下儻有志節  
大兵下崑山子升謂其妻曰我必死矣汝亦不可辱  
妻曰諾乃先縊其子次縊其妻懷練以出自縊于山巔  
佛閣

顧徵甫湯四鄉民大兵駐州城二人率直塘鎮民由

北關入城與戰執之皆磔死

按直水志顧兆行字貞孚明末武舉此作徵甫字音

相近未知孰是

王國璠字露玉諸生 大兵駐州城國璠率沙溪民由北關與戰衆潰死之

釋智介字端虛海寧寺僧善酒好鬪寓蘇州閶門順治二年六月 大兵至楊文驄拒守智介跳躍自奮與寺僧訣曰我此行當判一死汝等可生莫我乃飲酒數斗與其徒慧僧揮刃去尋接戰殺二十餘人奪馬跨之乘勝追擊後騎益集矢如猬毛慧逸去智介獨奮勇格鬪又傷三人中矢死同時釋隆樹字景賢太倉衛人結廬東洞庭山性爽直有膂力 大兵駐蘇州衆將攻城隆樹披重甲爲先驅城中精騎突出衆潰散隆樹戰死

嘉定縣

宋

姚舜元字景瑞有拳勇以武功爲保義郎平江府東南  
副將守吳淞德祐改元冬元師下平江姚氏爲邑巨族  
民樂歸附舜元語弟舜賓賓子卿貢士應龍曰國家厚  
澤在人大本未去收合散亡以應內援外事可圖也未  
幾元偏將東徇莫敢犯境十二月十六日會黃霧四塞  
襲兵猝至舜元不及備與舜賓應龍及次子興龍並死  
之元王逢詩賈勇收餘燼驚心歷大兵此時會少援葵  
藿本同誠尺五開符籍孤虛識陳營青峰寒入望銅  
斗夜傳聲朔吹刀如割南天蓋未傾小臣敢效死同氣  
忍偷生江湧濤沙合星流霧縠橫一門忠孝行春草尚  
情合

元



尤鼎臣州吏至正十三年方國珍由海道入婁江爲寇  
參政寶哥頃兵崑山不進鼎臣從州倅守上游者二年  
屢著謀效十六年張士誠入吳倅奉印降鼎臣阻之不  
得爲其將所繫唁以美官不屈乃扶之百餘終身錮之

明

陳竑本姓湯字泗泉崇禎時武舉副榜祇候軍門練兵  
孟河滁山遷靖江千總團練十五年三月海寇焚掠靖  
江逼江陰竑水戰於江陰之北殺賊數十賊却次日賊  
大至戰敗被獲懸檣杪射死

張錫眉字介竑上海人補嘉定學諸生舉崇禎三年鄉  
試徙居城中之甫里 國朝順治二年與龔用圓拒守

值 大兵駐吳淞龍率鄉兵邀戰中流矢死

張涵字凝之以諸生入史可法幕累遷內營遊擊行叅將事 大兵下揚州餉艘阻高郵可法令引兵接應既達而城已破曳之降不從遂斫死

邱繼武字起葉居沙岡崇禎十年由監生授醴陵主簿清介自矢有吏績崇禎十六年陞威遠經歷未赴主者留解南糧時張獻忠寇長沙道梗不得達遂僦民倉儲之同事者諷以去繼武曰我與糧俱存亡去將安之已而奸吏陳正光逆衿張清甫獻米於賊賊遣人執繼武武踞胡床謾罵曰邱繼武死則死耳肯從賊耶居民感其義醵三百金爲營脫繼武不可賊素知其名挾赴營

好謂之曰我方缺永州道今日相從明日富貴矣復罵如初或勸之繼武曰蔡江門死矣我久以忠義相許豈忍負哉遂遇害于長沙龍灣寺年六十有六入祀忠義祠蔡江門者名道憲長沙推官先繼武一日因城陷不屈被賊支解而死

諸錡字用湘初名福萃字聚之家素封僦習兵家言輕財慕義一時壯士如蔣若萊潘君明皆衣食于錡順治二年大兵平嘉定錡呼天泣血瀝誠動衆祖右數百人時淮鎮張士儀起兵劉陽城錡爲聲援大兵襲擊獲之九月七日死於西關之迎恩橋年四十籍其家

徐元吉字徵甫以將材歷任至台州海門遊擊順治十一年舟師過定海因勦海寇遇害四世孫以梅乾隆六十年邀恩承籍

王彪本姓尤字震之任吳淞水師提標中營守備順治十四年七月初三日禦賊戰死

黃仕賢吳淞松江右營把總以勦湖盜錢大死於泖

崇明縣

明

浦惟盛字宜中由歲貢生任浙江衢州府學訓導躬行訓士士多化之以薦召對稱旨擢寧王府教授惟盛知宸濠將爲亂屢諷不聽遂以疾辭命未下宸濠固留之

惟盛連上十三啟固諫王怒使人脅之遂自縊

施珽西沙人性慷慨好義有膽畧嘉靖三十二年珽年已老官稱爲耆民時倭入寇珽偕勇敢士與戰無不勝者因號耆民兵四月倭據南沙大掠珽率其衆與戰賊帥蕭顯素患珽聞其至設伏以待戰佯北珽追數里伏兵起且戰且走賊先斷橋不得渡前後夾擊珽與其衆千人盡死先是珽援太倉戰於城南大捷太倉人思珽請於總督卽其地建祠祀之祠在普救寺東

顧岡樊磯俱邑諸生家於西沙嘉靖三十二年倭犯境時方遷城未甃石千戶高某通於賊知縣唐一岑死之國與磯方合忠義民兵赴衛聞難慟哭謂其衆曰唐公

爲我民死我等宜以死報今日之事有畏縮者殺之民皆誓死受命倭善長刀國等以狼筈長鎗烟火勝之昧爽民兵四人與倭大戰無退却者不兩時倭二百餘人皆死知府以聞踰旬兵備道熊桴至國獮率其衆迎民皆涕泣稽顙爲言高遷戶逆狀桴請于朝并其黨八十餘人誅之而國獮未有所錄已而倭復犯太倉時民兵已報冊例如軍額給糧有警調用桴乃謂國獮曰公等皆義士向者大功今猶未錄某之罪也雖然某聞好義者不言功邇者太倉告急君等復能爲國家效力乎皆曰生死惟命遂率其衆千人與賊遇於婁江大獲又敗之於嘉定再敗之於蘇州倭聞崇明忠義民兵至卽遁

先是耆民施挺以民兵戰勝至是國驥所領亦稱耆民兵云

陸朋西沙人也以驍勇著名嘉靖三十三年倭犯境官兵自百戶田九疇外類無戰心知縣唐一岑素以忠義勗其下人樂爲死寇猝至急攻城一岑下令能殺賊者爲請于上臺不次擢用朋應募爲先鋒與九疇率其衆力戰皆被傷甚賊退解甲而死

施之炳字元度父臬太學生之炳少以諸生食餼好名義慷慨有大志先是臬爲讎所寃死獄中之炳誓必報一日偕兄之美偵讎所往擒之剖肉瀝血以奠其父自陳於官時推官某義之獲免母病迫號泣籲天割臂以

療之後遊吳門僦居虎邱山下巡撫張國維好士聞之  
折節造訪與語大奇之署爲中軍已而流寇老回回等  
犯安慶號二十萬國維以兵二千屬之炳赴援衆有懼  
色之炳曰賊素驕不足破也乃出不意直擊之賊駭遁  
其不敢窺江以南者之炳力也崇禎十二年召對稱旨  
授四川溫江令三載政績大著十六年擢雲南姚州牧  
未赴任而張獻忠寇蜀成都告急甲申檄著川西道監  
軍御史令督兵拒賊賊薄城下之炳且守且戰屢挫其  
鋒糧空援絕遂不能支八月初六日北城陷賊大入之  
炳割袍袖與僕朱清曰若持是歸報吾兄弟此生不復  
相見留此爲識遂自刎所乘馬亦哀鳴不食死卒年六



十葬衣冠于吳郡清流山

黃銘丹字丹侯邑庠生崇禎十二年流寇毀鳳陽陵銘丹憤激與妻子訣誓不破賊不復還因謁總督獻平寇諸策後署兵備道史可法叅謀十七年李白成陷京師時光祿卿沈廷揚方駐淮上銘丹投謁曰丹在史公所無所表見願假一旅以自效因令至崇明募水師師方舉而福王以江北分屬四鎮廷揚無分地遂無功乙酉南都覆吳中瓦解銘丹方抵浙中詢魯王消息及歸知廷揚已入舟山乃撫膺曰事不可爲矣於是南向慟哭赴海死妻施氏亦殉節

沈廷揚字季明少爲縣學生性慷慨慕忠孝大節崇禎

初歲饑廷揚助賑四千金後遊虎邱遇江東豪士沈茂之縱談方畧因出篋中海運書示廷揚廷揚拊掌曰方今天下多故餉道梗塞計莫急於此遂偕茂之赴京師授中書舍人疏海運事畧云臣生長海濱習知海道若沿岸而行多島嶼礁淺宜從元明故道自劉家河出海泛舟黑水大洋轉成山至天津楊村路甚便議格不行復以策干兵部侍郎倪元璐畧云請以家資先辦二舟每舟載千餘石率先海運倘損朝廷粒米請伏司寇若小試無失後請大舉元璐以聞乃命往運夏六月朔率舟自淮出海抵天津纔十日往見元璐元璐驚曰我於帝前謂公去何猶在此廷揚曰運已至矣元璐以聞因

授戶部郎中旋加光祿寺少卿十七年賊陷京師時廷揚方駐淮北向慟哭欲自裁茂之力沮乃止福王起南省史可法開府揚州命與田仰至崇明糾集水師部署未定而王師已下金陵廷揚屯據舟山依黃斌卿唐王命總督水師明年廷揚選水師三百艘北上戰輒敗及崇明復大戰四晝夜至福山颶風忽起舟膠乃與麾下七百人俱就擒先是洪承疇與廷揚善時爲江南總督欲脫之詐曰我聞沈廷揚已爲僧若敢誑乎廷揚語許承疇承疇怒遂下之獄蘇州巡撫土國寶亦勸之降不可因驅其麾下於婁門李王廟駢戮之無一人屈者黃仲融廷揚所撫遺孤甥時從廷揚泣詢後事不答固

問之乃曰我受國恩誓以死報無所恨第恨二親藁葬  
茲以屬汝此外何言嗣子元泰併就戮仲融收其屍歸  
葬妾張氏奔視含殮廬墓數十年及卒遂附葬別見列  
女傳廷揚卒年五十三葬于虎邱五人墓之西 國朝  
賜諡忠節

國朝

黃家蕝字元中順治初以鴻臚寺丞

崑新二志  
丞作卿

招撫蘇

州郡邑皆降爲楊文驄所殺事聞贈如其官蔭一子銘  
德入監讀書

沈存思字君懷官江陰縣守備順治三年勦賊陣亡年  
二十五

錢邦彥字尚燮由行伍歷官蘇鎮標遊擊遷廣東崖州  
叅將崖州環海多盜邦彥盡力接捕不避險阻乾隆四  
十九年秋率兵出洋捕盜猝遇狂風舟碎遇害贈雲騎  
尉世襲邦彥本籍通州曾祖徙崇明祖正曾任蘇鎮游  
擊遷京口副將父士麒亦任蘇鎮遊擊迨邦彥三世居  
其官時人榮之

貢生陸枚孫校  
生員顧思義

直隸太倉州志卷二十九終

直隸太倉州志卷三十

人物

治行

太倉州

宋

郝升卿字師古父喬見文學傳升卿紹興進士知常徽  
二州乾道六年自徽代還奏蠲本州額外勑料雜錢一  
萬二千二百八十餘緡及元認江東兩浙運司等處絹  
一萬六千六百餘疋其恤民類此

明

盧熙字公暨父觀子充楨皆見隱逸傳熙博古善楷法

洪武初以薦授睢州同知時兵燹後游饑熙以休息爲治明年攝知府事會御史來清軍伍括見民以充之幾千人熙正其籍止存數人御史責熙格詔熙抗言睢戶僅若干悉實行伍無民是無睢也又曷用守請以充役御史益怒然竟不能奪未幾卒于官知州爲營辦始克成殮歸葬吏民哭送盈路大雨無少却者且爲私制服一月先是熙兄熊爲兗州知府寄以詩曰藿鹽清夢穩鐵石古心存實無愧云

項駕字叔馭博學通春秋工詩文洪武初舉秀才擢禮部郎中調官廣東政尙廉平後調濠梁卒祀鄉賢祠朱日新號中齋本楊氏子幼育朱清家因冒其姓歷任

海道千戶宣武將軍婺州路總管居官廉敏賦役公平  
數平反冤獄歲歉出已粟以賑饑民民爲刻石頌德遷  
江州路總管亦以清節聞

龔登字叔言資性兼人嘗讀史記未匝歲人試之盡卷  
不錯一字洪武十一年以春秋經應試選岳州學正諸  
生有以通鑑贄者登覽畢封還之謝曰已拜貺數年岳  
州陞爲府詣闕候調與知府偕見上上問一切民情物  
力府震懼莫能對上顧登曰是官何爲者對曰臣岳州  
學官也因代府條對甚悉上喜曰此可給事朕廷遂授  
兵科給事中後以事觸上怒詔籍其家僅得賜絹二疋  
謫戍五開衛卒



虞祥字仲正永樂九年舉人授金華府訓導洪熙初除  
禮科給事中未幾掌科事僧覺貴夤緣太監創造毘盧  
閣僭擬非度祥奏毀之置貴於法尋陞通政司右參議  
正統八年進戶部侍郎改兵部卒奏聞命祭葬祭酒李  
時勉銘其墓子震字啟東性高介不樂仕進祥卒無遺  
貲僦居以養母兵部尙書余子俊請爲部司務辭之  
陳問字裕之景泰四年舉人選江西南昌知縣居官清  
儉南昌人云豆腐知縣嘗知縣豆腐香

桑瑾字廷璋弟瑜字廷瓚少孤力學兄弟自相師友景  
泰閒相繼領鄉薦同日授通判瑾得處州瑜得溫州瑾  
在處修復通濟堰灌田擒滅巨寇地有銀礦太監侵擾

瑾節其費以充貢瑜在溫屬邑泰順亦有銀坑歲久礦  
徵官必取盈瑜奏請減之蒲莊衛卒侵平陽民田訟久  
未決瑜直之軍民以安鹽竈戶多逃亡部議三丁籍一  
以充課瑜言有舊額可按乃止溫有夢草池瑜作堂其  
上兄瑾自處來相與觴咏修靈運故事初任時兄弟相  
約早乞休後竟同舟還里一時以爲美談桑氏五通判  
瑾處州瑜溫州瑾之子饒泉州翹之子大協杭州琳之  
子悅柳州

龐珵字朝儀天順三年舉人知沔陽州有惠政除屬縣  
竟陵大憝去後民猶思之擢宗人府經歷卒于官

蔡坤字一寧七歲能爲詩成進士後擢刑科給事中大

學士萬安學士尹直凭寵專恣李孜省以左道進內時  
梁方陳禧等相倚爲不法坤並疏其罪直聲震一時以  
失朝參出爲興國州州判遷安順知州安順在西南夷  
境坤順其俗爲綏輯民以安之遷衡州府同知超拜山  
西按察僉事兼督河南等處屯田多所釐剔王恕在吏  
部議內遷而坤已得疾不起坤慷慨喜功名顧仕輒齟  
齬家清約至無資以遣後

劉竑字以規成化元年舉人知縉雲縣以廉正考最擢  
定州知州治聲益著旣去縉雲民立碑思之

狄雲漢字天章由常熟學入國子監成化十年順天舉  
人知沅江縣政尙寬靜民皆愛信之郊外有名山無事

携妻子出遊民牽婦稚供果茗群披輿以行因語父老  
自愛我數游汝曷勝俱皆喜而拜都御史馬溥然行縣  
怪無訟者令隸呼之無一應者嘉歎去九年秩滿調臨  
清州判官州水陸會將迎不暇居兩月以疾致仕舊田  
二十五畝在湖壩歲號餘夫時或斷炊日過午室人進  
食曰清官喫麥粥雲漢吸粥對牆竹吟詠如故年八十  
六沒先是罷官還僦廬虞山下縣令楊子器聞之曰先  
生缺四壁矣就沙溪薄置產奉雲漢歸處士沈周作募  
買宅疏天章詩清古絕俗嘗與知州李端登城遠眺有  
南去好山都入越東來滄海半吞吳句李揖之曰先生  
語工若是信坐窮也

顧巖字希遂成化十年順天舉人選遂昌知縣始至平  
獄訟釋坐累幾千人後補山東莘縣治官如家擒巨盜  
活流民陞河間府通判仕宦十五六年未嘗以家累自  
隨卒以勞死

唐韶字尙虞成化十一年進士除蘭溪知縣擢御史巡  
按宣府大同恩威兼濟閭所部囚廉得其寃狀釋者九  
百餘人復刷文卷再按江西豪右歛跡歲滿部民請乞  
留任未報病卒年五十二贈布政使參政子符見列傳  
葉預字誠之成化十七年進士過河南武陽知縣遷知  
光州光人愛之致仕後輦輶相送百餘里歸額其居曰  
退菴

之卒于官年五十三後二十餘年知州鄧修建祠立碑於通天岳弟士字厚卿嘉靖二十年進士授工部主事分司濟寧閘河苦安居馬常南旺五百里諸河泛溢身先徒役冒風雨沈土塞口不日奏績終以忤權貴尤爲嚴嵩父子所銜落職歸卒在見列傳

周表字子儀嘉靖元年舉人授紹興府通判嘗署會稽縣事創三江堰閘渚水溉田皆成腴壤遷知雲南霑益州乞歸後數年紹興知府張明道因民之思欲建祠祀之不識其貌使畫工至其家圖以去州人陸之箕製貌工來樂府頌焉

朱邦臣字子貞父嵩贊吳氏僚壻陸某乞爲子教以讀

書中嘉靖四年舉人旣而陸之子邦教漸有聲遂復姓知嶧縣屬歲饑民嘯聚爲盜邦臣發庾賑之單騎入撫衆感泣歸田上司治狀第一以憂歸補仙居時新受倭難及是又報倭至或勸之去曰城亡吾亡分也率士民乘城四十晝夜倭傅城邦臣榜通衢以客兵四集急徵薪粟給餉又水際多設大筏以疑賊賊奪筏渡蒼嶺去已又有百餘入境邦臣與戰軍佯敗走遺乾糲置毒其中賊爭啖之毒發悉成擒未幾催稅檄下民千人昇土還官譁於廷邦臣令散偵尤黠者杖殺二人戍五十餘人政聲日盛以徭役忤里居李御史某爲所中量移黃縣李出爲山東參議修邾邦臣遂歸李亦坐免訾議終

其身

朱默字時言父星見文學傳默嘉靖十二年進士授建陽縣知縣輕徭賦不事鞭笞未幾憂歸喪祭循古禮既葬起補貴溪縣益尙清約不耐煩以鬱卒

葉遇春字體仁嘉靖十七年進士授泉州推官以執法爲人所擠尋知武岡州歲饑出官粟三千賑之民賴全活歷南京刑部郎卒著有禮記覺言

曹灼字用晦嘉靖三十二年進士授撫州府推官甫至有豪某以事誣臨州令灼置之法又奉新豪強娶里中女不從誣以盜斃其父灼訊之豪賄以金灼不爲動金陵人有殺從父者其親御史庇之灼曰吾不爲權貴撓



三尺法也竟坐死後擢刑部聲著西曹丁外艱歸閉門校方書曰吾當以政之活人者爲醫之活人者居鄉徒步從一平頭奴人目爲田舍翁卒後囊橐蕭然年七十

四

楊士元字仁甫十二爲州庠生三試皆冠其曹隆慶五年成進士授南陽裕州時年二十四折疑獄興學校以請罷市稅見忤於上謫廣東鹽課提舉不名一錢尋擢興國知州窮治盜賊釐正籍賦立礦禁修城郭建謝枋得祠居五年陞襄陽同知并攝府事營建雙溝呂堰諸堤梁皆以俸助之三入闡校士稱得人將擢御史念父老辭於吏部乃授南京兵部車駕司員外郎尋乞養歸

卒年四十有七

吳之彥字世美隆慶五年進士除中書晉廣東道御史  
會張居正請葬回籍臺省承望風旨公疏趣入京之彥  
不應爲權黨側目引疾里居萬歷九年起補河南道出  
按福建同安在籍少卿洪朝冕居正以其異已也屬巡  
撫龔之趣會疏不應居正恚左遷山東武德兵備道地  
故盜藪之彥清徭役署驍勇渠魁先後擒獲又葺學宮  
修許遠祠樂陵知縣某失事上臺欲移辜於署篆之教  
職之彥不可曰若以進士起家年尙少一蹶何碍彼苟  
藉寒官曷堪代黜執不從以父老乞歸二十一年卒於  
家

王臨亨字止之徙居崑山以萬歷十七年進士授西安知縣最調海鹽就徵齷於顯者轉刑部主事遷員外再遷郎中尋陞杭州知府未任卒臨亨性坦易辭氣溫讓顧精吏才任刑部時奉命審錄江北明年審錄廣東故事得減百人死臨亨減踰數吏以例請臨亨云我知活人寧計千咎卒減二百餘人高梁有盜珠者採珠太監以私憾張其事論死者六十人巡按李某救之不得臨亨至一日好語太監稱其施予急義太監喜乃及高梁盜案曰彼死固當第亡賊死或有後言爲公惜此義聲太監謝惟命六十人得不死雲南司兼掌都下獄緹卒多飛文冒功臨亨每比輕律前海鹽顯者死人訟其子

謀於臨亭謝曰我不能市怨于人之孤也及卒海鹽西  
安兩縣俱崇祀之子志堅字淑士一字弱生萬歷三十  
八年進士選南兵部主事南曹故閒暇志堅要同舍郎  
爲讀史社商畧前代行事又假焦竑藏書精閱無少懈  
秩滿升僉事提舉貴州以養親辭來往山閒至真珠塢  
樂其風土築山房讀書其中薦起浙江水利僉事念迎  
養便就官時議毀德勝諸壩令估艦直達會城志堅謂  
壩毀則湖涸蓄洩亡恃將水旱均病事乃止會餉急溫  
州推官創票鹽法商大困志堅又力陳非是乃已因母  
憂去起湖廣驛傳道清黃州九驛馬價驛得亡累隨遷  
其省提學道拔寒俊名試文錄曰昭質未終任而卒年

五十八志堅恂恂蘊籍負狷性門無雜賓坐起一小樓讀書最有法經先箋疏後辨論史先證據後發明爲世所稱嘗戒子弟曰願汝曹爲學究弊不過迂文人所流恐破方爲圓猶弗止也

黃元勲字宗甫萬歷十七年進士初任慈谿知縣歷平樂晉柳州知府陞按察使僉事兵備道至陝西布政使參政所至有善政尤大者在柳州不動聲色安十八司酋長之變元勲嘗自言曰吾仕宦三十年所至盡職未嘗邀一名譽未嘗受一私謁退歸著有口口叙錄

吳嘉祐字世德萬歷二十五年舉人三十五年選大名府通判郡故盜藪嚴督捕宿盜一清會水災條議請賑

全活無算創築黃堤民賴保障久之攝濬縣事爲政益  
尙清簡興文化拔雋才然往往與僚友忤遂乞休性愷  
悌每傾囊應人緩急四十一年兩司議置田贍貧士卽  
以百畝輸之兩司嘉其誼檄知州勒碑比之顧存仁云  
孫以敬字令修九歲通五經十五補州學生崇禎十年  
成進士年二十有二任甌寧知縣留心經濟六載政教  
推八閩第一行取入都復令長垣防禦流寇甚力旣見  
時事日迫遂歸優游林下者五十年歿時七十有九

國朝

錢廣居字大可寄籍大興崇禎十五年舉人 國初授  
鹽山令邑殘破賊黨潛匿山隘廣居咨狀或言舊令劉

某隱韓村能悉賊情卽往謁具以告遂帥數十騎突入  
賊穴多所斬獲餘悉散歸功於劉俾復職常獲賊偵坐  
堂鞠之懸燈於側抽矢射一發中燈賊散爲神相約毋  
敢犯卓異授工部主事歷員外郎轉郎中出守嚴州下  
車黜淳安遂安二邑墨吏懲訟師朱宋以法一郡肅然  
委勦山寇夏可日授關南兵備副使爲忌者所扼拂衣  
歸年八十三卒性淡泊以敦宗睦族爲本兩舉鄉飲大  
賓

曾紹唯字韶季順治二年舉人試身言書判居上等授  
三河縣知縣縣當山海喜峯古北諸口衝非幹吏不能  
勝任

世祖見除目

召問賜宴而後遣蓋異數也紹堦守

已以潔勤理公務民咸德之總督等各具疏薦將陞用以勤勞卒

曹有武號梅梁順治四年貢生授陝西同官知縣縣經兵燹有武清戶口豁賠累戢悍卒減羨餘循聲大著時前明宗藩子名張大魁擁衆集叢山以有武誠信來就撫有武具陳府道謂不可事遂已然大魁等感泣謂公在一日不敢犯境也明年以茶馬事被劾父老送哭盈道且出貲以賂逮者有武去三月而大魁引兵來城陷署事何某死之同官民立去思碑按察司副使寇慎爲文志之歸五年而卒年七十二嗣子集其文爲咏陶軒



遺稿

毛天麒字如石順治十五年進士授安義知縣丁父憂服除補襄城丁母憂再補魏縣在安義有大憝爲民害杖斃之禁絕豪猾之蝕民賦累重科者民運漕至省露積多耗爲建倉於省城滕王閣之左轉運稱便襄城臨蜀道堰棧口流泉以時蓄洩溉田千頃洫魏時值禁兵征滇黔檄天麒至大名養馬單騎任事供億芻茭不以擾民三任劇邑寬嚴因地善得民情積資應陞中書舍人引疾歸年八十四卒祀褒城名宦里居後無尺蹠至公府兩舉鄉飲大賔晉贈奉政大夫監察御史子序見文學傳

顧梅字商尹母娠夢鶴步梅坡因以梅名工詩詞兼好  
擊劍精騎射康熙二年舉人六年楊雍建巡撫貴州進  
勦吳三桂以梅有文武才題薦軍前効用始署黃平州  
綏靖苗犵並理軍需奉 旨加級 賜蟒袍授印江  
知縣旋丁內艱起補河南滎陽不二載又丁外艱起補  
陝西咸陽值歲祲梅晝夜賑撫嗣被詿誤時上司廉察  
得情題請開復尋補工部主事將入都驟卒所著詳藝  
文類

王緝修字方鄴吳子少能文中康熙二十三年副榜補  
國子監典籍四十一年授府谷知縣弭盜除强有神君  
之頌歿于任祀谷名宦祠

陸毅字士廸榮子幼孤力學工帖括康熙二十七年成進士除新建知縣爲政精勤修水利舉義學捕劇盜察冤獄以卓異擢戶部主事尋授陝西道監察御史奉

命巡城疏免琉璃廠通租多所建白未幾移疾歸居鄉二十餘年好施樂義里黨稱之卒年七十三

楊崙字星源康熙二十七年進士授洵陽知縣洵多虎患崙製文禱山神患遂息葺學舍集士子講論洵人始知學善決訟洞中民隱興利剋弊不遺餘力官舍隘陋土壁藜牀菜羹麥飯稱貸自給居三年以卓異陞戶部主事四十一年擢河南道試監察御史以疾卒同年臚錢殮之

曹延懿字九咸明副使達裔孫康熙三十年進士選程鄉令嚴保甲練鄉壯訪訟師置之法復增設義學教其秀良程鄉故水陸衝供億浩繁前令按畝倍科民不堪命延懿條其弊於上司節費寬征力反積習以母憂歸立宗祠置祭田越四年卒延懿未第時佐浙江總督李之芳幕駐衢州剪平耿逆多所贊畫子儀字亮疇康熙五十三年進士授中書舍人雍正四年典湖北鄉試出署安吉州旋補嚴州府同知廉易有父風

王抑字誦侯時敏第九子康熙三十六年舉人例補中書改太原府同知屢決疑獄上官以爲能攝忻州事有遺屍在棄灰中地當衝故多逆旅主人抑拘數十輩列

跪堂下徐察一人面色稍異卽往勘其家有血跡一訊具服乃謀劫財而殺害者衆以爲神明三十八年以憂歸病卒子愿字臯聞五十年順天副榜循例選涪州州判攝巴縣陞授保寧府同知有紳某恃勢奪民田愿廉得實斷歸民雍正七年功令丈量田畝愿親涖四郊纖毫無隱又委丈中州墊江不苛不漏上官稱之生平重意氣厚親族如其父風

錢汝駮字長黃晉錫子貢生選宿遷縣教諭遷鳳陽府教授卓異陞河南新安令鄰邑李一寧亢挺謀作亂臺司以兵委之汝駮直擣其巢擒盜首招撫萬餘人叙績擢戶部主事歷員外郎中出知長沙府事果銳任事閔

七載罷歸十有餘年卒

王調字燮鈞瞻弟康熙五十六年順天舉人教習官學以知縣用會父原博緣事戍肅州偕諸兄弟贖鍰歸始謁選發江西攝分宜縣有聲授豐城豐潁江民苦築堤之役調請給帑募夫著爲令民尸祝之三載卒于官

王俊字叔彥遵叔子康熙五十九年順天舉人歷任河南閿鄉山東歷城知縣陞湖北荊州同知擢陝西同州知府兼署潼商兵備道前後三十年所蒞有政績皆以經術飭吏治旣謝病家居修祖祠纂譜系拓祀田年七十八卒于家

王述獻字景彥父諤字中貽康熙三十五年與兄暮南

北闈並領鄉薦屢上公車不售卒述獻幼振撫於暮歷  
任隨侍多所贊助考授州同知効用北河後陞祁州知  
州以謹厚律已以勤敏辦公兼擅丹青通醫理卒年六  
十有五

王璟字曜節愿之子乾隆六年舉人三十一年會試後  
大挑一等發河南題補鞏縣審理重讞多所平反後調  
固始積勞成病年六十卒於官

顧之瀚字受其景錫子廩生以貲補平湖主簿終彰德  
府通判子璣字瑤珮有才略亦以貲選漢中府同知西  
南用兵常承辦軍餉迅速濟用捐俸修南北二堰以利  
灌溉尋卒於官

張瞻洛字文江以貲授湖北安陸通判丁內艱起補河南彰德通判擢雲南大理知府瞻洛初蒞楚北勘災督賑民德之繼在河南十年署篆兼攝案無留牘入滇剔積弊懲豪強境內肅然以會鞠僞案罷職家居卒年八十一長子淳乾隆四十五年舉人善詩文未仕而卒

汪志綦字禱初由歲貢生任徐州訓導勤于課士刊學海津梁程墨文雋爲諸生式陞湯陰知縣治行尤懋賑饑全活甚衆行取晉秩部曹遂不出築他山草堂觴咏自適卒年七十六

滑士麟字穎儒拔貢生少從沈德潛受業以貲官雲南白鹽井大使滇屬邊境文教未孚士麟喜化導來學者



咸以詩文就正焉泣任六載以疾卒於官人立祠祀之  
周模字受全廣裔孫世居鶴市饒才幹循例候選郡丞  
授順天府糧馬通判都市浩穰貨易喧厯五城經紀多  
積猾模廉得之悉力懲禁攝治中兼攝大興篆所至有  
稱秩滿遷戶部員外假歸卒子瑛字彩符亦以貲授順  
天府通判克繼父績擢刑部員外郎既假歸里居會挑  
濬七浦河力任其事桑梓利其德年五十一卒

錢文梓字泗良乾隆九年舉人三十一年會試後大挑  
一等發山西補天鎮知縣邑常苦旱賴上流水注始得  
灌溉有大石莊與陽高接壤陽民遏上流莊民爭之乃  
白郡守召陽令議設牐更番啟閉並受其利治獄精敏

尤以扶良鋤暴爲已任劇賊某爲民患以計掩執之窮治其黨盜藪一空西寧人某因奸殺其夫棄屍同竄鄉甲以無名報廉得之擒至一鞠而服又署大同暨保德州俱以能稱四十七年引疾歸益以樸厚型鄉里卒年七十二次子敬熙字亮廷由四庫館騰錄議叙州同分發湖北署漢陽通判武黃同知以獲盜功陞授沔陽州知州有循聲卒於官

周洵字學蘇乾隆十二年順天舉人由宣城縣教諭陞浙江湯溪知縣調金華洵熟諳吏治所至清積案決疑獄卓薦以內艱歸起補安徽虹縣歷攝懷遠定遠清理獄訟一如在浙時推陞糧馬通判損苛政汰冗役尋護

正統九年少宗正 卷三十一  
治中印以疾歸卒年七十有二弟淳字希陳乾隆二十  
五年進士授貴州清谿知縣地當孔道困於役淳善撫  
循不以累民輿情愛戴知府亦賢之調繁荔波蓋新開  
苗疆也淳治以簡靜苗大服知府遷去代者欲興山谷  
之利淳持不可因令收教去選鳳陽府教授年餘卒於  
學署

鎮洋縣

國朝

陸燦字潯文家貧力學有志行乾隆十年進士貴州巡  
撫張廣泗聘主黔陽書院以經術造士士風丕變選授  
廣西博白知縣廉幹審斷如神監生某姦殺僕婦尸棄

於江燦訪得實借他事拘監生至一訊輸服朱謝二姓  
爭田訟踰四十年燦斷以田歸朱而以前入官餘田令  
謝佃種皆悅服陸川民陳某利孀嫂產與母謀虐嫂嫂  
忿自盡知縣他出燦代驗母叔誣以姦敗慚縊燦疑之  
令陳母子出偵共密語者則孀弟也嚴鞠之稱陳姓囑  
勿露許分財產乃按如法又修書院葺縣倉多惠政在  
任四年以疾卒喪歸民哭送百里

王文徵字士芳幼孤乾隆十七年成進士授知縣發廣  
東歷從化興寧新安海陽四縣報最陞同知二十一二  
十五年分校鄉闈稱得士母老乞終養歸病卒在從化  
創立書院海陽俗悍時構大獄文徵嚴治首犯省株連

又創建育嬰堂置義塚多惠政

彭禮字行之因父育於舅氏故榜姓吳乾隆十八年舉於鄉十九年會試中明通榜三十一年成進士授山西寧武知縣縣俗鄙儻少文禮擇秀良者教之使各訓於其鄉士始重文學村婦以奸殺其夫詭報自縊禮廉得之論如律有歐傷其父者立杖殺以示衆然後報聞上官才其斷弗罪也巡撫農起將薦之會起卒不果以年老乞休既歸貧乏不能自存因復就潁州府教授四年而卒初禮就選時寓郡下取史中循吏傳錄之或謂古今時勢異宜禮曰變者其跡不變者其道神而明之安在不如古人乎予三兆蓀最著才名

畢澐字涵清沅弟乾隆二十四年舉人三十一年分發  
江西以知縣用歷署贛州同知德興知縣撫州通判寧  
州知州所至有政績任德興時有吳姓兄弟爭產訟數  
年不解澐以一體曉之遂相持感泣式好如初寧州介  
兩湖之衝棚民雜處稱難治澐悉心審斷八閱月而結  
積案者百五十件值米貴請發常平倉未得報亟勸富  
戶出粟以糶市價頓平年三十五卒於任

王琰字孚達乾隆二十七年鄉試副榜考授州同發直  
隸河工歷任安州通判祁山州同擢正定通判陞大名  
同知經理滹沱河工程疏洩有方漳河水發防護居民  
安堵上官器重一時有遺愛之日卒年五十一

趙大澐字瀛洲乾隆四十三年進士尋以日下舊聞館校錄議叙分發山東知縣歷任淄川禹城肥城寧陽冠縣博山益都棲霞等處蹶而復振者再宦途連蹇恒怡然自得既奉 恩旨開復授昌樂縣地雖彈丸愛民勤事夙夜匪懈年五十三以疾卒於官

直隸太倉州志卷三十終

直隸太倉州志卷三十一

人物

治行二

嘉定縣

明

黃采字宗素洪武中由歲貢薦授監察御史藍玉之獄平反詿誤者三百餘人數言事調尤溪知縣先是縣有役用里胥拘繫市民以集事采至釋之示以信義民安而事亦集復召爲御史出知兗州考滿民詣闕請留至九年調知紹興卒於任采學行純正爲治有循吏風從兄琮字廷玉洪武首科鄉舉知中部縣有惠政終府同



知

陳述字宗理宣德間以賢良薦授御史巡按江西歷浙江右叅政移四州左叅政會流賊聚衆剽掠官軍失利述至推誠招撫降者三百餘人殲其渠魁餘並釋歸復業其地遂寧旣而德陽賊燒劫什加安縣移屯彰民述統官兵以正兵當賊衝復出奇兵撓之所獲資蓄輒以充賞不旬日悉平初蜀民不知力本述爲設法勸課數年之間農桑遍野民用饒裕巡撫累疏薦述以年老致仕晉階二品蜀人立祠祀之

范純字誠夫居羅店天順元年進士授南京兵部主事成化初以刑部員外郎出爲四川僉事分守川北所轄

番部道險前巡按案驗芻糧率用移文勾當純親歷殆  
遍嘗督運至威州會蠻衆攻城甚急純用羗兵以計破  
之轉松潘兵備副使萬安在內閣其子肆橫鄉里輒繩  
以法鎮守內官承旨市鷹鵠所過州郡索路費千金民  
不能供純白止之弗聽嘆曰吾不能庇民可復仕乎卽  
移疾歸同年彭韶巡撫江南素交厚絕不干謁嘗與同  
官某會飲酒半某與伶狎純遽拂衣起厲聲曰風雅掃  
地矣其平生剛正類此

宣景字汝昭授經里中邑之治詩者多出其門龔宏其  
高弟也中成化四年鄉試選惠州府同知丁外艱服闋  
都御史王恕見景文謂必端士薦補西安府同知以廉

惠稱時御史李興屬推官袁經按貴人獄反爲所構事連御史景乃代二人引咎於衆中慨然曰悞二君者景也卽日投効歸旣而告人曰吾豈爲袁李棄官哉誠不欲令御史爲人所撓使法不得行耳袁後爲御史按吳景言不及私袁歎曰吾至蘇不撻一人此所以報公也卒年九十四

李良字堯臣成化五年進士仕南京刑部郎治獄不務鈎距而善窮人情尙書重之諸曹疑牒輒移決焉出知瑞州府俗獷悍喜告訐訟繫多至千人良至釋連坐與亡驗者而窮治其尤獄以衰息民多逐末遠賈不歸良教之務農始相次復業值歲大祲爲長短補貸法全活

甚衆政暇輒進經生與宣暢疑滯析若解觴以憂歸子憲字大章上林院署丞孫亨字嘉甫興寧縣主簿

龔宏字元之四歲能書成化十四年進士除嚴州推官入爲南京刑部主事員外郎吏部郎中出爲兗州知府有借兌糧萬石寄養馬千匹非究所賦而其籍歲徵之以爲常宏考核奏免入覲以卓異賜宴錫服擢叅政乞終養繼丁內艱構三隱堂有終焉之志起爲福建右布政遷湖廣左布政時鎮守太監爲暴宏逮治其黨六十餘人璫爲斂敢入尹應天擢右副都御史總督河道武宗南巡稱爲幹事老臣遷工部侍郎五疏乞休晉尙書馳驛致仕嘉靖初遣使存問加一品服卒賜葬祭五世

孫錫爵字汝修萬歷二年進士初令永新舉卓異由工部營繕主事改都水司時漕河水決言治水者蜂起尙書潘季馴言河強淮弱惟築堤束水用水刷沙可以濟漕錫爵力贊之迄用奏績滿九載遷廣東叅政一日訛傳海南黎人將稱亂總督議發兵錫爵謂島嶼小醜豈敢無故蠢動當先以尺書諭之及廉得其情知有山田數萬頃爲強宗蠶食而思逞錫爵因清其疆理黎輸服遷按察使廣西布政使俱有惠政卒爲強宗所中罷歸寄情林壑自號石巖仲子方中字仲和有氣節能詩王春字景元成化十六年舉人初令浙江建德以才能改江西德安爲政公廉嚴於治盜邑中夜不閉戶去官

日民攀轅塞道常御一袍終其任不易及歸杜門却掃以終

徐恂字信夫成化十九年舉人知浙江嵯縣鋤奸剔弊課最改福建南靖值海寇薄境恂環柵爲壘募民驍勇者教之兵出擊賊俘斬數百人餘衆遁去事聞賜彩幣以勞瘁卒官縣故有過山錢爲民害恂至裁革未及著爲令民泣曰過山錢又自此始矣

沈璧字惟拱父壽宏治八年舉人璧正德二年舉人父子相繼以易學名四試禮部不第乃就教諭得江西鄱陽未上以母喪歸服除選南豐久之陞建安知縣值歲饑布政使檄州縣市糴轉輸之璧曰民旦暮死必得米

如索之枯魚之肆也第解銀米商隨之矣已而果然他縣糴者皆不及也御史行縣未至十里停舟欲拷掠人索獄具不得方盛怒壁抗言曰卽至治所而不得則令罪也柰何責之中途且此亦非拷訊地御史愧屈無何御史來守蘇州語其屬曰沈建安非汝嘉定人乎汝曹學之不忠不爲良吏也壁以考滿將入覲過家遂乞致仕監司方列狀薦之聞而歎曰咄咄沈君負我矣

唐恩字天寵正德九年進士知松陽縣俗悍難治恩以愷悌得民心歲貢橙糕民苦額外苛索恩至改爲官辦廉潔愛民令家人紡織以供薪水監司交章論薦尋病卒推官萬奎檢其橐祇俸金三兩而已

甘元雋字舜登正德十一年舉人署定陶教諭遷知陵  
縣有清操耿介不阿失上官意罷歸四壁蕭然手不釋  
卷以詩名及卒有司爲之營葬

邱峻字惟陟嘉靖八年進士歷官大理評事左右寺正  
每讀獄詞必反覆紬繹同舍郎欲下署輒捉其臂曰君  
輩勿輕作允字允字上當流血也錄囚浙江請罷校尉  
隨行民以不擾子集字子成通經博物精三禮尤熟濂  
洛關閩書其論古今沿革損益之故瞭若指掌學者稱  
寒谷先生性孝友當倭亂時與寡姊各埋金於地尋遇  
倭被脅祇出已藏與之伯兄與兄子先後坐逋賦當戍  
集奔走營救至被累繫獄積年乃解家益貧或日不重



炊冬以故紙敗絮爲被而讀書不輟晚依妻族周氏居太倉雙鳳里年八十卒

李重字威甫本農家而不辨五穀獨善讀書博學強記人以奇詞奧義相質爲言見某書某卷歷歷無僞中嘉靖十三年舉人選長興縣教諭辨難經史多士悅服遷深澤知縣廉潔自持日與經生討論尋解綬歸初民有善黃白之術者一豪公子求其方不與遂陷以大盜重廉得其情釋之及去任其人追送五十里外并獻其方重曰汝幾以此及禍奈何以禍我子孫焚之而去祀長興名宦

龔有成字子完學於歸有光不攜卧具講誦達旦倦極

假寐而已嘉靖十六年舉於鄉兩上春官所與偕者多以疫死同舍爭避去有成獨留視醫藥死爲含歛護其棺以歸謁選爲福建詔安令邑在嶺海之交倭難方發界中盜亦蜂起左右多爲盜耳目者令欲有所爲輒傳布盜中有成陰致其首諭令縛盜自贖於是盜爭解散而倭益至城中或爲內應匿倭大櫃中伺者以告夜掩捕之并得同謀者二十餘家盡誅之倭乃遁去在縣七年會贛之龍南賊方張福建江西撫臣會請調爲龍南令有成以賊皆編氓雖出流劫未嘗殺官吏掠府庫可撫而定也乃親歷其巢曉以禍福賊率妻子號哭請命競獻飲食受而嘗之寢處巢中凡數十日賊大悅願輸

田租編里甲出所虜子女由是終任無爲盜者進贛州府同知前後治縣事凡十三年兩以卓異特薦會憂歸服闋入朝無復知其事者矣補萊州府同知後遷蜀府長史致仕年八十餘卒

張情字約之嘉靖十七年進士弟意字誠之少從兄學先十年成進士官至山東按察司副使罷歸而情始登第初任處州府推官處俗健訟多匿名詞情悉察之桀黠歛跡其治務解釋疑滯不以操切爲名奏最當行以金鄉磐石二衛久相構情留反復開諭入計後期僅授刑部主事尋改南職方職方多羨餘吏以進曰此會計所不及情拒不納歷駕部首增馬快船工料而寬責其

羸減京營餉馬之額又以馬頭困於守支立法通融皆爲永利出爲九江知府會調三峒兵備倭所過縱暴情郊勞飲食之境得不擾取魚陂直築六門不費民一錢五年遷福建副使倭寇方急情提一旅抗之先後斬獲數百解連江圍竟以疾免時意家居已二十年矣意性簡畧爲山東副使時見御史無加禮御史銜之會獄有稱貸不償購娼奉之誣以奪其妻者御史遽欲當以強奪罪意於衆中爭曰實娼也法不當死御史怒不應意亦拂衣出交章相劾以是去職後御史至者竟出其人於死情之歸也裴橐肅然如爲諸生時兄弟徜徉林壑人咸羨之情仲子應武孫振德各有傳

唐愛字良德家貧力學嘉靖二十年進士令南安邑隸泉州阻山濱海設重兵其餉均諸七屬邑他邑民多詭入竈丁戶漸減餉不能給而南安在山谷閒不煮海監司見戶口如故議以他邑兵餉借編於南安民不堪愛請於上官願代他邑勾稽於是欺隱者畢出嵒嶼水寨去邑三百里歲輸粟萬石其軍弁率與牙僧通苛索無厭愛力請平價輸銀俾自易粟著爲令累遷至職方郎中出爲四川僉事浙江參議遷雲南副使調山東政績多可紀子正雅字正叔十餘歲作七言長篇有雋思老於諸生

張任字希尹嘉靖二十六年進士授都水司主事督造

漕船於淮南勾稽歛散宿猶袖手三年間所積贏羨至八萬餘兩晉員外郎出判大名同知嘉興移守袁州嚴嵩袁州分宜人衆素橫一切繩之以法累遷貴州叅政聞父病棄官歸萬歷改元再起浙江布政使轉山西擢右副都御史撫廣西屬境內旱奏請蠲賑又請勦十寨諸蠻爲民害者捷聞璽書褒勞復條上善後便宜七事悉見施行及卒朝廷閔任以死勤事得祭葬贈官兵部右侍郎廕子其廉入監其廉字伯隅萬歷二十三年進士累官至車駕司主事職南北驛傳攝環衛馬政並有能稱出典楚試瑄求列名序錄不可轉儀制司荆藩如冒乞名封與尙書力爭不得移疾改南京文選卒於

官

沈陽字復卿嘉靖二十九年進士知沙縣綜核精明入  
爲御史上帝學八章奉命清理畿內莊田奪勲戚宦官  
隱沒者一千九百餘頃復上牧政十事巡按四川忤權  
相謫判裕州量移南康司理歷撫州同知廣信知府隆  
慶初方以卓異內召竟移疾歸從子紹僖字廷和萬歷  
二十五年舉人爲蒙城教諭遷國子學錄禮部司務改  
吏部時趙南星爲尙書稱其清慎擢武庫司員外郎庫  
事有與內廷惜薪司相關者魏忠賢欲於柴薪常額外  
加派三萬兩紹僖曰帑藏如洗必不能加卒奪其議嘗  
奉命至杭西湖方建忠賢祠布政使邀遊湖上謝不往

職造太監李實來謁不見旋以疾歸

沈人种字時雍嘉靖三十八年進士初知德清有聲入  
爲吏部主事出歷浙江副使游歷山西雲南廣東福建  
布政使再入爲光祿太常卿又以副都御史出撫福建  
其治以精勤嚴核爲用而所至必以惠愛稱嘗榜於廳  
事曰吏不畏吾威而畏吾之廉民不愛吾寬而愛吾之  
嚴所設施可見矣先是備兵關東西嘗攝諸司事至佩  
七印塞外憚其名不敢犯朝廷聞之有白金彩幣之賜  
其在浙也溫處二州盜起不在部界而遣丞督兵以往  
出賊不意一時駭散以無子得心疾歸卒

錢春沂字仲與爲諸生時父被冤繫慷慨陳情竟出死



獄後舉嘉靖四十三年鄉試由繁昌教諭選德化令吏以美餘進沂曰此百姓膏血也却不受未幾求歸上官弗許遂書林下風清四字置馬首而去優游詩酒者二十餘年乃卒

陳其詩字汝正年十三通經史舉嘉靖四十三年鄉試由廣宗教諭遷知黃梅縣內艱歸起補新泰禱雨泰山夢神授以杯水質明大雨礪賊王邦傑嘯聚宮山臨其寨撫降之有死囚赴決道逸監司將罪其詩囚聞之曰我不可以負賢令君遂就死後降山東鹽運司知事卒於官其詩性孝父嚴厲居官時猶輒予杖必跪謝俟父解顏乃起事繼母亦如事父

張懋字子培嘉靖二十九年進士知福清廉明仁恕丁外艱補孝豐其民採礦率阻險爲賊懋以德撫柔黨悉解散復均田賦以寬貧民遷南京職方主事南京歲造馬快船畿輔及江西湖廣積逋料價銀八十餘萬懋賫勅往安之凡歷三十餘郡無敢以私恩者道遷車駕司員外郎過家謁母欲移告未及而卒懋孝事嫡母貲產悉以讓弟沒之日篋中祇二十餘金

張恒字伯常萬歷八年進士知茶陵興國二州入爲刑部員外郎恤刑浙江多雪冤獄冢宰陸某屬以重囚免卒按如律晉郎中出爲建昌知府政務清簡片言折獄建昌人稱爲張半升言候鞠者不携宿舂也盱江故有

橋稅中璫議加額恒白巡撫夏良以太守例入美金五百兩歸公帑稅得不加秩滿遷按察副使分巡南昌閣臣家與民爭湖利恒毅然曰相國何藉此斷歸民晋布政參政以母老乞終養歸

重見列傳

周之謨字公顯通經學萬歷四十一年成進士授開州知州州民苦俵馬每一匹價十兩官扣其四軍衛復多橫索之謨因躬自給價而所進馬毛齒尺寸無不如令民俗禱雨鞭旱魃至有斃孕嬾碎屍骸者又多同姓爲婚皆力禁之考最擢職方員外郎旋以疾卒

趙洪範字元錫幼極貧勤學不少輟登天啟二年進士初令麻城入爲御史巡按雲南未期土酋普名聲叛攻

彌勒州官吏素無儲棄城宵遁撫臣王伉爲樞部所劾  
有旨逮問并及洪範下詔獄尋釋歸久之歿

徐時勉字克勤恂五世孫崇禎初歲貢生授澄城令刻  
勵清操欲除猾吏反爲所中落職臨行邑紳孫弼明贈  
麥六斗曰此非交際禮爲使君數日糗糧耳歸而僦居  
城中精毛詩學者宗之

### 國朝

吳康侯字得全又字定遠明崇禎十二年舉人旅力過  
人喜讀書自少至髦手不釋卷 國朝康熙元年謁選  
知武康縣始至邾舊例香斗銀五百兩武康故多山賊  
爲民害康侯輒親往擒治遂屏息在任三載以本籍奏

銷罷歸坐臥一小樓醯鹽與丹黃錯集畫龍虎松石雄  
勁蒼古勃勃有生氣人傳寶之

項思尹字莘友性惇篤順治初由貢生廷試授兗州通  
判督視泃河向設夫銀爲河官肥橐思尹至悉革之因  
侃直忤上官意被劾左遷篋中惟遺遊泃詩草一卷歸  
家後教授弟子以給日用死之日至不能殮兄思臣好  
義明末籲免濫加漕糧銀二萬七千餘兩人咸德之

朱奇穎字兼兩父大經年十三應試作易書三藝補邑  
諸生性孝友先世墓地屬他性者以館穀所積贖之所  
受嗣父田產悉均之兄弟順治九年由貢生廷試授山  
西平遙縣知縣以任遠不獲迎母留妻王氏奉侍歲輒

令子以俸歸省性清介遇事無大小不當意輒與上官  
力爭以是多銜之者遂去官年七十六卒

倪士鈴字岩三震子淵源家學才猷幹練以歸安丞署  
知昌化縣有德政子奕洵字眉望年老 恩授八品

章服

申毓來字子巽荃芳長子康熙二十三年歲貢由教習  
授江西南康知縣在任六年以愛民稱時太守欲行均  
田法履畝清稅毓來不可甚銜之而奪於理曰此強項  
令也丁艱歸後二十餘載康民猶感德立祠儒學鍾維  
正作記鐫石

錢松字茂南外同人幼孤好讀書弱冠爲國子監生隨

舅王敬銘入都康熙五十六年順天鄉試卷列首薦同  
考以不得掄元固爭見斥由纂修古今圖書集成書竣  
議叙知縣歷任上蔡考城羅山淇縣鹿邑內鄉六縣居  
官勤慎清介自矢令淇時值歲歉設法賑濟朝夕親督  
其事胥吏不敢侵蝕復以饑民多疫疾搜集奇方全活  
甚衆修葺學宮振興文教丁母憂服闋補鹿邑縣實授  
內鄉縣旋卒於官

葉昱字炳南八歲就外傳過目成誦甫搃觚千言立就  
嘗游唐孫華張雲章之門詩古文詞樸茂典雅乾隆元  
年成進士授戶部主事丁外艱服闋仍在戶部勾稽考  
核吏不能欺旋補主事洊陞員外郎中充  
大清會

典纂修官十三年充會試同考官用薦授長蘆運使澤  
已奉公商民交頌三載秩滿卽請告歸葺鄰家廢園以  
居閉門却掃二十餘載年八十四卒爲人坦易工書法  
閒寫山水最善墨菊

李夢璫字登五家貧幾廢學王世樞獨受而教之乾隆  
六年舉於鄉明年成進士歸主澄江書院十三年選江  
西萬安縣十六年六月因公鐫級將行士民設帳祖道  
有九十六歲老叟劉某扶杖來送曰某見長官未有如  
公者明年引

見仍發江西以知縣用歷署建昌安  
樂實授信豐俗好鬪至死不惜夢璫示以恩威獄訟少  
減旋丁祖母憂二十四年赴補復發江西署景德鎮同



知又署臨川上高鄱陽二十七年授弋陽移贛縣兼理  
贛州府事三十年署寧都州又因公鐫級再引見  
復以原官用選湖北安陸縣未行病卒夢璉居官廉潔  
人不能干以私又聽斷敏遇有疑案上司輒委讞決知  
贛時縣有屯田賦溢額者廉得其實劾上官得除減著  
軍屯議二篇載集中分典鄉試所拔皆得人其卒於都  
門也貧不克歛同年侍郎金甡率同人經紀之始得歸  
殯焉子賡芸乾隆五十五年進士今任浙江平湖縣知  
縣以政績被卓薦

金洪銓字聖宜明司業洲六世孫雍正十一年進士授  
吏部文選司主事陞考功司員外郎充河南鄉試副考

官明年陞稽勲司郎中提督肇高學政肇高在粵西偏地僻遠文體固陋洪銓時引諸生勉以通經學古試竣復命具言粵中教養事宜下九卿議多施行者旋補授浙江溫州知府溫州重兵駐防卒皆狡獪難制先是永嘉之寧邨民夜數錢投于櫃鑑然有聲邏卒排戶入誣以賭博有閩客卧牀亦曳起同繫諸獄卒復取所藏骨骸以實之縣令鞫訊不承鄉民遮道號冤大吏下其事於府洪銓至或勸爲卒地不聽讞日悍卒十餘人瞋目環視洪銓叱之退遂白民冤而置卒于法溫州民貧生子女輒沉之水洪銓倡育嬰堂全活甚衆值歲大旱亟發常平倉穀減價以糴力請大吏弛海禁以通福

建米商復勸富室持穀者減糶於市民得不饑頃之用  
細故望吏議歸居十年而卒年七十有四洪銓少日嘗  
侍父祭墓得司業制誥於族人屋壁間繼又得所用硯  
由是讀書益力子鳳綬自有傳

時鈞轍字若濱偕行五世孫性孝父母病醫藥罔效刲  
股月進之而愈雍正十一年成進士授庶吉士乾隆元  
年改主事洊陞員外郎中十一年典試陝西擢河南道  
監察御史有蹇諤聲明年出爲慶陽知府抵郡整修學  
宮訓學生日文品如景忠烈李空同乃茲地近代楷模  
諸生勿甘讓古人也寧州民以嫌貧重婚控立斷完配  
先聘者十七年調繁鞏昌下車除茶商陋規隴西瞽民

王喜與貢生王佐才比奸遣喜子鳳翔遠匿詭稱爲原清馬益等毆死毀其屍縣鞠之原清等誣服鈞轍究獄情舉可疑者六條以聞於大吏謂必得屍而後可問抵請緩之後偵知確情寃始白通渭縣劉超毆妻權氏死密訪得歲貢生王名士嗾超休妻檄名士到府與超母隔別研訊係名士與超母通奸碍於權氏遂使超母毆死超得出獄閭郡稱神焉二十一年署洮岷道活寃獄二十餘人是冬以薦入覲卒於京邸

寶山縣

國朝

印光任字黼昌縣廩生雍正四年

詔舉孝友端方

應總督尹繼善之薦發廣東以知縣用授廣寧調高安再調東莞所至捕盜殺虎去害民者修學校設書院拔其俊秀新興民誣其仇謀逆鞠實釋累係者四百餘人督撫奏聞卽命海門添設同知令其駐劄後以事落職引 見仍發廣東尋補南澳同知陞廣西慶遠知府

再調太平皆有善政會鹽引不銷被議而罷卒年六十有八嗣子憲曾字昭服乾隆十五年順天舉人明年成進士分發廣東授翁源知縣以能吏稱內擢吏部稽勲司主事三擢至吏料給事中京察一等 特授浙江

寧紹台兵備道蒞任八年督視海塘監理關稅吏民奉條教不嚴而治大計卓異以年逾七十引疾歸里卒爲

人仁慈尤寡慾獨好鼓琴晚年自號淞汀云

侯傳山字硯陽監生學書於張照有詞翰名與修八旗志書成議叙裕州通判署襄城縣事歷任廉敏民咸德之以憂歸居親喪不作佛事尋卒

鍾文標字上亭乾隆十二年順天舉人十七年揀發福建授光澤知縣振士風決疑獄歲饑賑粥平糶民賴以甦迎養父母手書一聯於室曰製錦餘閒勤舞綵烹鮮過後勸加餐尋丁外艱服闋補寧德知縣邑瀕海素患潮災濬河渠建橋梁民以利涉調建寧亦多惠政充十八三十年兩科同考官復以母憂回里服闋選四川丹稜改調安徽潛山兼攝桐城開濬漳葭河舟楫賴之以

疾卒于官

劉簡字敬夫幹之子附貢生充一統志謄錄官議叙選授安徽南陵縣丞尋攝邑事乾隆五十年泗州被水委辦賑務往來盱眙洪澤間盡錄災戶以上有以數濫構之知州者方揭報待劾而上司知其愛民遣回任泗州民執香送者數百人著有南軒詩鈔子繩祖字研存乾隆十八年舉人三十五年揀發四川以知縣用時金川跳梁署西川調辦青溪臺站軍務兵差絡繹糧餉轉輸無誤凱旋議叙授湖南新田知縣舊習里長有官油官木之供皆償其值而除其擾民戴稱劉父母著有書山

詩草

崇明縣

元

施文勝字文質早遊京師有識量太保馬札兒台雅重之至元五年薦授從事郎太保府長史歷加承直郎都水少監時鄉人多由海漕登仕籍唯文勝操履端謹累薦清要卒贈中奉大夫集賢院學士輕車都尉吳興郡侯

明

徐基字彥履永樂三年舉人以監察御史巡按河南聲名赫然郡邑咸畏服之

房震字孟威永樂中以修書薦授山東諸城知縣有善



政前明邑人爲知縣以聲績著者自震始

袁文華字茂實邑庠生以善書薦授刑部主事存心寬恕折獄明允陞山東按察司僉事提督河道便漕運軍民利之考最陞副使

張璉字廷器宣德十年拔貢任浙江處州府同知時有巨盜盤踞山澤間三司不能勦方事招撫賊曰必得處州分府命方來璉乃挺身獨往諭以大義賊皆額手曰張公活我也遂與偕來一郡得寧事聞陞河南彰德府知府未赴任而卒先是崇明

文廟缺祭器璉特置處州窰器俱用焉

陳翼字良輔景泰四年舉人任兗州府通判改調順天

時漕河淤塞翼佐平江伯陳瑄疏治有功召賜御宴陞  
南都治中以方峻忤吏部意適與楊繼宗訐奏左遷廣  
東鹽課司提舉掛冠歸

楊鏐字君寵成化元年恩貢任四川新都知縣有才名  
會委採工木力爲設法事辦而民不擾功竣調湖廣通  
山縣政聲大著上官交章論薦以親老乞歸

盛璉字巨材成化八年歲貢授鉅野令邑有馮生者才  
而貧璉厚資之及馮登第爲巡按江蘇時璉以彰德府  
別駕歸馮具金爲壽璉曰君不知故人乎峻辭弗許

樊軒字克高成化十二年歲貢授台州府太平知縣力  
除強暴一時豪逞者悉爲斂迹後致仕歸罄囊以濟貧

乏絕足公庭有古節士風祀鄉賢

龔天錫字遐齡成化時由歲貢任山東恩縣訓導陞徽府紀善時承平日久王奢淫過制天錫奏狀削王爵改淮府紀善致仕歸

顧謚字大寧初從外家傅姓後歸宗幼喪父兄謹教養之成化二十年成進士授工部主事命權臨清關稅廉介稱職尋丁內艱服闋改刑部主事執法不阿擢本部郎中以梗直爲權要所惡致仕歸杜門掃軌人仰其高致卒仕鄉賢

施鉞字國用西沙人成化二十二年舉人授江西吉安府推官性嚴峻人不敢干以私薪米皆取給於家飭家

人按期載送官舍後以母老乞歸

黃章字時憲正德十一年歲貢生任湖廣桂東知縣以寬和著聲凡有聽決一秉虛公丁母艱士民賻之乃得扶櫬歸桂人立碑思之

施一德字子修美玉子正德十六年進士初授行人尋授監察御史奉命董顯陵大工大監蕭洪欲染指羨餘一德悉奏歸公帑事竣巡按廣西時大旱禱雨輒應洪銜前怨嗾守陵者誣以督工無狀謫州判未任丁艱服闋建補寧府推官尋陞台州府同知後任四川僉事道入蜀一載以母老乞養囊橐蕭然構一堂顏曰清白卒

祀鄉賢

胡鳴鸞字聲伯家貧好學事親孝中嘉靖元年舉人授  
京山令清介鯁直時藩府驕橫鳴鸞裁正之復流民千  
家補烙馬數百士民戴德勒去思碑祀鄉賢

陸仲武字德威嘉靖三年歲貢生授慈利知縣後改光  
化潔已愛民卓然有異政常以事至澧州水漂城市仲  
武督舟力救全活者百餘人時世廟南幸獨以稱職受  
賞妻瞽敬禮不衰撫遺姪如己子卒祀鄉賢

朱魁字文徵嘉靖十年貢生授龍陽縣丞以廉明薦陞  
闕中知縣政務寬卹節驛困釐竈弊囹圄幾空後致仕  
歸年八十四而終

陸子復字啟元隆慶元年歲貢生任四川昭化知縣會

清丈杜豪強兼并吏胥畏服陞雲南景東府同知土人立碑思之

王之翰字凝宇以諸生入貲爲遼東廣寧衛經歷時義州有以人命誣陷者之翰爲申於大吏事得白未幾丁艱將歸其人鬻女得金餽於途堅却之令贖女歸後轉裕陵經歷年八十有五

樊大成字集全以例監生任壽光縣主簿時白蓮教倡亂大成督兵援勦有功陞張秋鎮巡河大使予戶部郎中銜告歸

陳一道字滄溟萬歷十年舉人選山東新城教諭尋陞南京國子監丞爲白祭酒馮夢楨事忤當事意補廣西

梧州府同知協勦皮林洞蠻有功賜宴賞以疾致仕歸  
子相明貢生

龔有成字敬蒼萬歷十三年歲貢生署江西靖安縣事  
廉潔無私解組日囊空如洗嘗傳其妻周氏私積錢爲  
一釵有成拔之投水其勵志如此

倪千驥字冲臺萬歷二十五年舉人授福建羅源知縣  
政務安靜不尙苛察遷王府長史與同年周順昌意氣  
相合天啟中見政事日非謝病歸時邑中領鄉薦者例  
有摘撥田千畝驥盡數歸公不治生產子孫多能繼業  
者

樊守中字達泉萬歷中舉人任山西嵐縣知縣居官廉

明鄉試分校所拔士皆名宿尋歸構一小樓額曰不辱  
不殆週植修竹隱居賦詩年七十有四

顧宗叙字廷禮新豐縣新田巡檢巨盜劉伯淵依山負  
固聚衆劫掠宗叙擒勦之無遺類一境帖然

國朝

何棟字與偕順治四年進士除邵武府推官攝福州府  
篆時聞師悉赴泉州經略廈門會城空虛適鄭成功率  
衆自海道襲福州巡撫永貴瘍發於背不能視事因素  
重棟材盡以城守事委之棟力請釋原任布政使周亮  
工於獄共阨險禦之及賊攻城十三晝夜棟力固守城  
獲全入爲戶部主事歷江西提學僉事告歸卒



朱廷瑜字元洲順治四年拔貢生初選邵武府推官改授上高知縣居官清介不合時宜期年罷歸民間有十可惜之謠著有筠陽小草

王希曾字孝先康熙五十二年進士由翰林院編修陞左諭德雍正三年授山東學政文風丕振兗州府有陋規侑舞生四十名每名繳銀若干兩助學政養廉希曾悉除之遷少詹事以請假葬親卒於潞河舟次

陸柄謙字元吉順治五年副榜官廣西奉議州判地荒蕪柄謙勸開墾人給牛種一年遂成膏腴民敬愛焉後陞江右宜春知縣廉約自持催科不擾尤勤課士邑遵其教乞歸後讀書不輟兩與鄉飲

李登雲字晉黃順治六年進士授刑部主事洊歷真定府知府有政聲築滹沱河民被其澤有恒山餘蹟載白馬堤記

郭起潤字楚材父備琦以禮部尙書韓茨薦與修一統志起潤省父至京考入國史館授廣東長樂縣典史濬河建橋設法弭盜邑民立碑誌頌歷擢嘉應州吏目湖北漢陽縣丞署漢陽縣事所至有政聲以葬親歸卒於家

黃振鳳字元聲康熙十八年進士初任河南唐縣知縣自流寇蹂躪地荒民少振鳳集流亡輕徭賦民襁負而歸者幾千家旋以丁憂服闋補直隸邯鄲縣爲七省通

衢多盜賊至則嚴保甲察窩藏安撫巡緝盜賊漸絕四十四年春大旱民饑乃出倉穀二萬餘石貸民民感其德建生祠以祀旋陞昌平知州以老乞歸卒年七十有四子雲路字駕青庠生入貲選乾州州判聽斷以公年三十六卒於官

吳標字四瞻父震先以方正聞標康熙五年舉人選靖江教諭十八年成進士授攸縣知縣俗醇樸標以靜鎮之在任九年民無大辟者俗尙巫覡標召諭父老改業者半縣南舊多虎歲捕四虎以聞謂之季虎有關則責獵者標命遇虎卽捕勿以數拘旋以病卒於官弟楷字四則舉十七年鄉薦性孝不樂仕進嘗謂標曰兄報國

弟養親各行其志可也好讀書手抄九經終身不輟

陸允斌字爾兼康熙四十四年舉人以貲爲中書科中書改就知縣選奉天開原縣縣在山海關外民閒置產議不隨糧仍係原主代納每至流亡無著允斌至俾糧隨地辦開原常平倉穀向以十之三貸民春貸秋償後將正供逋欠移指春借而益其息吏胥侵蝕累負三萬有奇刻期徵比民受其害允斌設法緩徵且請大吏革其弊其負者部限歲徵四千石允斌念民困復請減之三易府尹而請益力府尹乃以聞得減半并下其法于屬邑東省之賦以清地近邊試纔數十人允斌歲時進諸生講說文義士爭向學三年膺卓異又明年以開原

儲穀霉爛數多盡變田產以補之尙不足續邀恩  
免而疾作年七十有二

周玉甲字聖賓康熙四十五年進士選陽武知縣多美  
政前任某以虧帑不得歸玉甲曰同官爲僚忍膜視乎  
代償二千餘金邑多浮稅詳減耗羨之半虛豁雜稅二  
十七則釐剔糧蠹飛洒積弊邑人德之聽斷以誠不事  
鈎索而兩情相得大吏嘉其能鄰邑有遷調輒傲兼攝  
焉兩充同考官稱得士治陽武五年丁艱歸邑人建祠  
立碑以誌之年八十有五卒於家

龔熙字慶繁康熙四十六年以吏員考授陝西武關驛  
丞歷署永尉值大饑捐俸賑粥歲施絮襖助婚葬合邑

建坊榜曰惠兵澤民雍正元年遷授廣東開建縣尉建  
龍吟橋民利涉焉兩護縣篆有政聲五年以葬親致仕  
歸里

陸錦字霞遠康熙四十九年舉人任樂清知縣清廉明  
斷邑人敬愛之充鄉試同考官卒于試院

施諧字紹虞康熙四十九年舉人乾隆四年選真州教  
諭論文以理法爲先黜浮崇雅所識拔皆知名士

楊純字天錦父遠江浦訓導純康熙五十六年舉人授  
湖南永明知縣歷署武岡道州知州有惠政建義學興  
教化吏治爲楚中最卒於官永明人肖像祀之私謚仁  
清年五十一

施瀛登字學周邑庠生康熙五十九年以貲選授揚州府學訓導瀛登教士務以樸誠啟聖宮就地捐俸修之雍正元年江都荒歉奉檄查賑悉心勘核吏胥無敢作奸者民頌其德在任三載以親老乞養歸卒

倪仙淇本姓沈字子長歲貢生選太和縣訓導歷署太和穎上二縣暨壽州學正勤于訓課隨在有聲遷國子監學正卒於家子世鏐奕銓鏐字能夏邑庠生入貲授大理寺左評事銓字又濤候補州同知

施上治字遇唐縣廩生以貲授廣東肇慶府同知尋改廉州先攝廣州理事同知督修粵省城垣築雷州遂溪堤閘及涖廉州革鹽務陋規除鐵稅商民便之尋攝廉

州知府歲饑乏食發倉平糶全活甚多雷州盜梁貴等十三人於海寧界刼殺上治偵擒之海康令懼有處分上治請以功歸之後被誣離任河督白鍾山等薦赴河工委攝山清外河同知築高堰告竣未及留部議發雲南上治陳親老改浙江承築仁河海寧塘丁憂回籍逾年卒子行寬字巢雲以貲選授雲南陸涼知州州半屬土司境歲徵無定冊吏胥意爲輕重行寬合計州田與丁銀酌地肥瘠而盈縮其平爲民久遠利雲南人以潞水者謂海山麓海子旁地數十里冬春可藝麥秋水至則成巨浸行寬度形勢瀦濁流而淤之漸成高阜并絕水患州西一水橫亘約五里民病涉請發帑建橋課邑



中士有成進士者自來所未有也其俗或一妻兩夫或兄弟死則收其妻行寬集衆勸誠責成保甲犯者罪無赦俗乃革大吏以爲能命攝羅平平夔兩州縣政聲一如治陸涼時五年卒于官弟行簡字達夫饒幹濟略在南河七年報最選雲南澂江府通判尋緣事罷行時字傳霖以附貢議叙州同簡發浙江先後攝錢塘永嘉等十縣篆不名一錢而聽斷詳慎案無留牘所至頌聲載道

倪陸經字漢石由貢生任績溪教諭訓課有方以卓薦授知縣需次京師而卒子龍光字右尊歲貢生候選訓導孫華勲字肇三庠生曾孫思謙字東表皆以文行世

其家

李宗晟本姓蔡字子六以歲貢生授廬州府學訓導尋  
丁艱起補鳳陽訓導勤于課士文教聿興學宮傾圯捐  
貲修葺給假回籍卒年七十一

祝禮字紹美入貲官浙江鹽運副使常命參賑事不待  
發帑解囊給之勘漏澤園基址悉返侵佔採銅雲南多  
羨餘悉以歸公攝寧波同知其地濱海洋舶交匯弁兵  
多索詐禮嚴禁之旋改處州以父疾告歸後目眚不赴  
職居家多任卹風卒年五十

楊遇春字芳吧乾隆七年進士授於潛令九年充鄉試  
同考官所得皆知名士以辦災課最調繁蘭谿廉明益

著丁外艱歸兩邑民爲立去思碑以疾卒于家

黃鳳字廷儀性好施予助建普濟育嬰兩堂錢六十萬  
屋一所田百三十畝巡撫題叙以通判用先効力海塘  
署杭州通判繼授紹興又攝諸暨縣事悉有善政旋以  
病歸卒

黃景式字雨雍監生考授州同知改懷柔縣令先是懷  
邑百姓欠課積二千有奇貧不能償式傾囊代之以薦  
署昌平州調順義縣兼署古北口同知旋署密雲縣兼  
沙河同知以公悞免士民遮  
御輦懇留得復職并  
護理霸昌道旋以疾卸事適

上幸順義問之左右以疾對遽命大醫診視

賜藥

酒治之蓋異數也疾篤卒于官年四十三

祝忻字松緣大中孫景南子入貲選刑部郎中出爲安徽廬州知府值歲旱力請賑次年合肥無爲巢三邑水荒亦如之民有帶刀肆寇者忻誅其渠首一郡畏懷遷貴州貴西兵備道屬員虧空議革職奉恩旨仍發雲南以道員用署迤東道搜採銅苗設法輓運銅額遂足調糧儲道旋辦安南案又隨總督永昌駐防巡守關隘總理軍需以永平保山私借常平事連坐旋奉旨開復以終養歸卒

生員

黃烈校  
王國寶

直隸太倉州志卷三十一終